

Ekwo-ozì, Pòlu Deru Nù Ndu
Filipayi

¹ Oo mbèdua, bụ Pòlu; mu lẹ Timoti, bụ ndu l'ejeru Kéreshi Jizòsu ozi l'ede ekwo-ozì-a anụ ndu-nsò ono, bu lẹ Filipayi g'èphe hakòta; mbụ ndu ono, èphe lẹ Kéreshi tũgbaru bũru nanụ. Anyi edekwa iya phò anụ ndu-ishi Chìochi phẹ mẹ ndu ejeru Chìochi ozi.

² Gẹ Chileke, bụ Nna anyi; mẹ Nnajiuphu, bụ Jizòsu Kéreshi meeru unu eze-iphe-oma; mekwaaphò g'unu buru l'èhu-guu.

Pòlu epfu anụ Chileke l'opfu èhu ndu Filipayi

³ Mu ekeleje Chileke mu ekele iphe, bũkpoo teke mu rìtaru unu. ⁴ Tekenteke, mu epfukpòo opfu èhu unu g'unu ha anụ Chileke bẹ mu egudeje èhu-ùtso epfu iya.

⁵ Noo kẹle e -shi kẹ mbòku mbụ ono, unu nũmaru ozi-oma kẹ Kéreshi ono bẹ unu shièpho e -shi teke ono eyeru mu èka l'anòdu asa ozi-oma ono asasa g'a nũma-dzuru gbiriri jeye nta. ⁶ Iphe lanụ, mu ka akòta òhu bụ lẹ Chileke ono, bụ iya bụ onye watarụ eme iphe-oma ono l'èhu unu ono bẹ l'e-gudeèpho nno eme jeye teke oomefufu iya l'ishi lẹ mbòku ono, Kéreshi Jizòsu a-bya ono.

⁷ Noo ègube òriri, mu arijeru unu bụ ono; kẹle òo iphe, gbaru mu l'ememe; eshinu unu nò mu l'òkpoma. Noo kẹle g'unu ha bẹ anyi l'unu tũkoru gbarụ mgba l'eze-iphe-oma ono, Chileke meru mu ono. Mu nò lẹ mkpòro nta-a; anyi l'unu tũkokwapho gbarụ mgba l'eze-iphe-oma k'agbaru ozi-oma ono òdzori; bya agbakwarupho mgba l'eze-iphe-oma k'anòdu eme iya g'o shihu ike. ⁸ Sụ-a; ò kwa Chileke bẹ bụ onye maru l'òo òkpobe-opfu bẹ

mu epfu sù l'oghoroko unu g'unu ha dù mu shii; ono b̄uru n-yemobu ọphu shi l'ẹka Kéreshi Jizọsu.

⁹ Iphe, mu anọduje epfu anù Chileke b̄u g'o mee g'obu ono, unu yeru nwibe unu ono nọdu akaẹpho shii eje; wakwaphọ g'unu kabaa amaru Chileke ọkpobe amaru; mẹ g'unu dù ike marwetajẹ iphe, gbaru unu l'ememe. ¹⁰ Ọo ya b̄u g'unu aduje ike họtaje iphe, ka ree mee; k'ọphu b̄ukwanu mbọku ono, Kéreshi e-kpe ndiphe ikpe ono ruwẹpho; oolewarọ l'unu doberu onwunu ọrù; ọ tọ d̄uedu iphe, ọo-ta unu ọta iya; ¹¹ elekwaphọ l'umere, unu shikpọo meta lẹ ndz̄u unu l'ophu b̄ukota umere, p̄furu ọto, shi Jizọsu Kéreshi l'ẹka; umere l'e-me gẹ ndiphe kwabẹ Chileke ùbvù; jaa ya ajaja.

Egude ndz̄u onye egoshi l'a nọ-doru Kéreshi

¹² Unwunna mu; iphe, mu eme g'unu maru b̄u l'iphe ono, dapfutaru mu n̄u ono bẹ gbẹ yetabakaanù ẹka g'ozì-ọma ono kabaanù edzuru mgboko. ¹³ Noo kẹle iphe, b̄ukotakpoo ndu ojọgu, eche nche l'ibe onye eze; mẹwaro iphe, b̄u ndu ọzo bẹ t̄ukowaru makotaru nta-a l'ọo lẹ mu ejeru Kéreshi ozi bẹ meru g'o gude a t̄u mu mkpọro. ¹⁴ Nta-a bẹ mkpọro-a, a t̄uru mu-a mekwarù; ikpoto unwunna, anyi l'ẹphe kweru kẹ Kéreshi t̄ukowaa b̄uru ndu obu kabawaa eshihu ike; k'ọphu ẹphe kabaa asa ozi-ọma ono kpaakpaa; ọphu ọ d̄udu onye ẹphe atsù ebvu.

¹⁵ A makwarù-a l'o nweru ndu gude ẹnya-p̄f̄urupfuru ezi ozi-ọma kẹ Kéreshi ọbu; mb̄u ndu ezi iya n̄u g'iphe, eeme l'opfu; ọle o nwekwarù-a ndu ọphu gude obu ìphóró ezi iya. ¹⁶ Ndu k'ono, gude obu ìphóró ezi iya ono bẹ ezi iya n̄u; opfu l'ẹphe yeru Kéreshi obu. Noo kẹle ẹphe maru l'ọo ya bẹ kuru mu gẹ mu bya agbajẹru ozi-ọma ono ọdzori. ¹⁷ O be lẹ ndu ọphuu ezi iya n̄u g'ọ b̄u iphe, eme l'opfu phọ; egudedu obu phẹ ezi iya ono;

bụ iphe, ephe emelepho bụ g'iphe-ehuka-a, mu eje le mkporo-a, mu no-a kabaa shii.

¹⁸ Olee o bu; ?mu eyekwanuru phe onu? Mbua; ?e gude obu iphoro epfu iya-o; ?o bu l'o nweru iphe, ndu epfu iya nu vu l'uche epfu iya-o; iphe, o bu; iphe, o bu; g'e pfu iya nu mee g'opfu ehú Kereshi ono jedzuru mgboko. O kwa iphe ono e-me g'ehú tsoo mu utso. Mbukwa ehú je anodukwaro atsowa mu ro nno. ¹⁹ Kele mu maru l'eshinu unu anoduje epfu anuru mu Chileke; teme Unme Jizosu Kereshi nodu anoduje eyeru mu aka be mu maru l'ee-mehaa haa mu. ²⁰ Iphe, mu dobekporu enya dobeshia ya ike bya aburu iphe, mu ele enya iya bu le g'iphe aduhabe be mu ta abyadu emeru iphere nu onwomu l'iphe, bu iphe, mu eme. O chia iphe, obu eshihuje mu ike mu eme iya; mbu emekwa iya eme iya nta-a ge mu shi emehawa iya; bu le mu e-gude ndu mu g'o ha ekutse Kereshi; ?o bu mu le ndu? ?o bu mu l'onwu?

²¹ L'ehú nkemu be bukwa; mu -nodu ndu; mu anoduru iya Kereshi; teke mu nwuhuru anwuhu; ono abuwaruru urwu gbaaru mu. ²² Obenu teke o bu le mu no ndu l'eli-mgboko-a be mu a-ka ejetaru Kereshi ozi; o ya bu le mu ta maedu ophu mu a-hata. ²³ Uzi iphe labo ono be mu pfuru l'echi. Ephe tuko alo mu ibekboebo. Olee ophu egu iya agushi mu ike bu ge mu laa lapfu Kereshi ge mu l'iya nodu. Ono ka mu ree okpobe akaka. ²⁴ Obenu l'o kakwanurupho unu ree okpobe akaka ge mu nodu ndu swibaaru unu. ²⁵ Eshi ophu o doru mu enya egube ono be mu maru le mu a-nodu-a ndu nodu swiru unu g'unu ha; yetajeru unu aka g'ehú-utso unu akabaa shi, bu iya bu ehú-utso, shi l'ekweta unu. ²⁶ O ya bu; teke mu l'unu noephe ozo g'unu a-kabaa enweru iphe unu azobe gude mu aba abaa; eshinu mu l'unu tukoru buru ndu

ẹphe ẹ Kéreshi Jizọsu tųgaru bųru nanu.

²⁷ Ọle g'ọ dųhabe; unu mejeẹkwapho umere, gbaru onye anu ozi-oma ke Kéreshi ono; ọo ya bu g'ọo-bukwanuru: mu -du ike bya ndu unu; ọzoo ẹ mu ta aduhedu ike bya; mu anule-a l'unu gude obu lanu pfuru pfushia ike; anukwapho l'unu ese iswi ekwekwe ono, unu kweru k'ozima ono. ²⁸ Unu te ekwekwa g'ọ duru iphe, ndu opfu unu e-gude yee unu ebvu ilile. Ọo iphe ono l'e-goshi phe l'ọo ẹphebedua l'emechaa laa l'iswi; unubedua a-buru ndu aa-dzota. Ọ buru Chileke a-tuko iya mekota. ²⁹ Kele unubedua be Chileke mewaru g'unu kweta ke Kéreshi; wafua g'unu jeje iphe-ehuka l'opfu ehuiya. ³⁰ Nta-a be mu l'unu gbaakwaa mgba alwu ọgu ono, mu shihawaa alwu ono, bukwa iya pho be mu alwu nta-a. Teke ono, mu shi alwu iya ono be unu gude enya unu huma iya. Ọle nta-a buwaa ẹ nchi be unu anu iya.

2

Anwu ẹka Kéreshi

¹ Ọo ya bu; ekweta unu kwetaru ke Kéreshi; ọo meru obu shihu unu ike to? Obu ono, o yeru unu ono ?l'ọ duje-a unu obu? ?Unu ẹ Unme-du-Nso tųgaru-a buru nanu? ?Unu emejeru-a nwibe unu odo? Mbu-a; ?unu aphujeru-a nwibe unu obu-imemini? ² Ọo ya bu; unu mee g'ehu tsọo mu utso tsọfu mu iya l'ishi. G'egomunggo unu bujeerupho nanu; n-yemobu unu aburu nanu; obu unu me uche unu abukwarupho nanu. ³ Unu ta akpajekwa enya l'iphemiphe, unu eme. Ọphu unu ekujekwa onwunu iphe, unu ahadu g'ọo ya l'iphe, unu emekpo ememe. Unu wozeje onwunu ali l'eka nwibe unu no. G'onnyemonye rijeepho l'iphe, gbaru k'ememe bu g'a ka akwabe nwibe iya ubvu; eme ẹ yebedua. ⁴ G'ọ to dukwa g'unu ha onye buepho iphe, a-duru iya ẹ ree be

Ọonoduje achọ kpurumu; ọ kwa g'onyenonu chojekwa iphe, a-duru ndu ọzo lẹ ree kwaphọ. ⁵ G'uche unu yẹe kẹ Kéreshi Jizọsu bọjeru iphe lanu.

⁶ Jizọsu bẹ shiẹpho lẹ mbu
duẹpho gẹ Chileke du.

Ọphu ọ dudu teke ọ
rijeru l'adudu ono ọ
du gẹ Chileke ono bẹ
ya tee wofubaedu ẹnya.

⁷ Ọ chia iphe, o mechiaru
bu l'o meru onwiya
onye adudu iphe, ọ bu;
bya eworu onwiya
mee nwozi.

E mee ya ọ buru nemadzu.

⁸ Eshinu e meru iya ọ
buru nemadzu;
bẹ o wozeru onwiya ali;
bya ekweta anwuhu;
mbukwa anwuhu
k'eli oswebe.

⁹ Noo g'o gude Chileke
wolikwanaa ya eli;
ọ kakota iphemiphe l'eli.

Ọ bya agua ya ẹpha,
kakota shii l'iphe,
bu ẹpha, aazajẹ azaza;
¹⁰ k'ọphu iphemiphe,
du l'imigwe;
mẹ ọphu du l'eli
mgboko ọwa-a;
mẹ ọphu du lẹ mkpula
ali a-buru;

ẹphe -nụmaepho ẹpha
 iya ono;
 ẹphe egbushi ikpere;
 baarụ iya ẹja;
¹¹ waa k'Ọphu onyemonye
 e-pfu iya hoo haa
 l'Ọo JizỌsu Kéreshi bụ
 Nnajjuphu;
 shi ẹgube ono kwabẹ
 Chileke, bụ Nna ùbvù.*

Aburu ìphóró, dù l'ọchii kẹ mgboko-a

¹² Ọo ya bụ; ndu mu yeru obu; teke mu l'unu shi nọdu bẹ unu shikpọekwapho anuru mu opfu. Unu kabakwaa mu anuru opfu nta-a, mu nọ unu ụzenya-a. Unu gude ndzụ-agugu mẹ ẹhu-anmanma; meje g'a maru l'adzotawaru unu. ¹³ Noo kẹle ọo Chileke bẹ bụ onye ereshi ire ike l'ẹhu unu. Ọo ya emeje g'unu chĩa idzù mee iphe, dù iya ree l'ọkpoma; mee ya g'ọ tọberu.

¹⁴ Sụ-a; iphemiphe, unu eme; unu ta agụjekwa aphụ me iya; ọphu unu alojekwaru ntụmego ye iya. ¹⁵ Ọo ya bụ k'ọphu unu l'a-buru ndu adukpoda iphe, aata unu ụta iya; unu aburu ndu dọbe ree; tẹme unu abukwarupho unwu Chileke; ndu adudu iphe, ẹphe gude merwushia onwophẹ l'echilabọ ẹjo ọgbo-a, egomunggo swehuru; tẹme ẹphe nọdu anọduje eme ẹjo ememe-a. Ọo bụru l'echilabọ phẹ bẹ unu nọ egbu nwịnwii g'ìphóró lẹ mgboko-a; ¹⁶ mẹ unu -gude opfu ono, l'anụ ndzụ ono ewopfu phẹ. Ọo ya bụ gẹ mu enweru iphe, mu e-gude eku onwomu mbọku ono, Kéreshi a-bya ọzo ono; k'ọphu ọso ono, mu agbakpọo ono mẹ akanya ono mu ese ono taa bụduru mu ọla-l'iswi.

* 2:11 2:11 Gụnaa Azá 45:23.

¹⁷ Ophu o dukwa me obetaru e gbua mu gbashì mee mu l'ekweta, unu kwetarù waa l'ozi unu eje be ehu a-nòdulekwa-a atso mu utso; mu l'unu atukolea ete eswa. ¹⁸ G'o bukwarupho nno bu g'ehu l'a-nòdu atso unubèdua utso kwapho; mu l'unu etekwapho eswa.

Timoti yee Epafurodayitosu

¹⁹ Mu arikwa le Nnajiuphu, bu Jizosu eme mu-a ge mu zia Timoti g'o bya agbaphee unu; k'ophu oo-bya akoruru mu g'unu eme ala; gude dua mu obu. ²⁰ O to dukwa onye ozo, mu nweru, du ge Timoti, bukwanu onye oriri ehu unu echije ehu. ²¹ Ndu ozo g'ephe ha be abujeerupho oriri ehu phe be echije phe ehu. Ophu ephe ari-vujeedu iphe ophu buwaa ke Jizosu Kereshi l'oriri. ²² Obenu le Timoti be unu mawaru-a l'o goshiwaru onwiya le ya bu onye gbaru g'e gude ire iya eka. Kele o shi teke ono ejeru mu ozi ge nwa ejeru nna iya le k'ozima ono mu l'iya eje ono. ²³ Oo ya bu le mu arikwapho le mu e-zi Timoti ono ibe unu egwegwa me mu -bebeepho maru g'oo-mechaa nwuru mu. ²⁴ Teme mu gudekwapho Nnajiuphu eka l'o to dudu ge mu anoberu; mu abyawaa agbaphee unu l'ishi onwomu.

²⁵ Mu byakwapho arija le mu zifutaje Epafurodayitosu, bu nwune mu bya aburu onye mu l'iya tukoru eje ozi k'alwu ugu ehu Kereshi ono; bukwarupho onye ono, unu ziru g'o wotaru mu iphe ono, mkpa iya shi duru mu ono; g'o bya ndu unu. ²⁶ Noo kele oghoroko unu g'unu ha be shiwaa uzanya duta iya; mbu l'o shihawaa uzanya tsuta iya l'ehu l'unu numaru l'iphe shi eme iya. ²⁷ Iphe shikwaa eme iya eviya; k'ophu o ghuduru nwanshi me o nwuhu. Ole Chileke phuru iya obu-imemini. O to budua yebèdua nwekiya be o phuru iya. O phukwaru iya pho mbèdua; o-buru-abu me aphu atso mu ishi

labo. ²⁸ Oo ya bu l'ò gbenu ka mbèdua ehe ihee gè mu zikebe iya g'ò bya g'unu l'iya kwee; k'òphu èhu a-tsòkwanu unu útso l'unu gude enya unu hùma iya ozo; gè mbèdua agbabuhukwanuru iya egomunggo. ²⁹ Oo ya bu; unu gude èhu-útso gbobe èka labo nata iya okpobe anata; l'ò bu nwanna, unu l'iya mè Nnajiuphu tukuru tugba buru nanu. Unu kwabejekwa iphe, bukpoò ndu du gè yèbedua úbvù. ³⁰ Noo l'ò phòduru nwanshì mè ishi iya abaa l'eje ozi Kéreshi. O mìa enya lè ndzu iya; emeru mu iphe unu gege anòdu emeru mu.

3

Okpobe apfùbekoto

¹ Sù-a; èka mu a-sùberu iya unu ishi; unwunna mu; bu g'unu nòdu Nnajiuphu l'ime tee eswa. O tò tsukwa mu l'èhu edephuru unu iphe, mu dehawaru azu; noo kèle oome g'unu kabaa egude èka l'iphe, mu pfuhawaru unu ono.

² Unu kwabekwaru ndu ono, bu nkuta ono enya; mbu ndu ono l'anòduje eme èjo ememe ono. Unu kpakwaru phè l'aphara; mbu ndu ono, ekebutajè nemadzù ekebuta g'o bua úbvù ono. ³ Kèle oò anyibedua buru okpobe úbvù; mbu anyibe ndu gude Unme-du-Nsò abaru Chileke èja; tème anyi nòdu anòduje l'èka Kéreshi Jizòsu ete eswa; ophu o dùdu iphe, anyi gùberu iphe, eeme l'anù-èhu.

⁴ Ome oò iphe, eeme l'anù-èhu adzoje nemadzù mè o buru mbèdua gege asuje l'òo ya a-dzò mu. O -buru l'ò egube nemadzù onye bu l'adzoje iya; mè o -buru mbèdua gege enwechiaru iphe, mu g'a-zòbeje sù l'òo ya l'a-dzò mu. ⁵ Noo l'a nwuru mu; mu nòpho abalì esato; e bua mu úbvù; mu buru onye Ízurelu gèdegede; mu buru onye okpa-ipfu kè Benjiaminu. Mu bukpoò onye Hiburu; mbu okpobe nwa, ndu Hiburu nwuru. A

-bya l'eme iphe, ekemu ndu Jiu pfuru; mu b̄uru onye F̄arisii. ⁶ A -bya l̄e k'iphe, aph̄u l'̄ehu b̄e mu shi b̄uru onye ach̄i nta Ch̄iochi. A -bya l̄e k'iphe, ekemu pfuru s̄u l'̄o o ya b̄u onye -meru iya n̄u; onye ono ab̄uru onye pf̄uberekoto; ono ta ad̄ukwa ̄ophu aata mu ̄uta iya l̄e mu mesweru. ⁷ G'̄o d̄uhabe; iphemiphe ono, b̄ukota iphe, mu shi an̄o duje ar̄i l'̄o o iphe, a-bar̄u mu urwu ono b̄e mu gudeakwa iswi ̄ehu K̄éreshi wofuk̄ota ̄enya; ḡuru iya ye l'iphe, b̄u mu iphe, ̄ola-l'iswi. ⁸ ̄O t̄o b̄udua iphemiphe ono; iphemiphe ̄ozo b̄e mu t̄ukokwaru ḡukota l'iphe, t̄ukoru b̄uru mu ̄ola-l'iswi; k̄ele urwu ̄ophu rwuberu mu ̄eka, b̄u ̄ophu nȳiberu g'at̄u ̄onu iya, b̄e b̄u K̄éreshi Jiz̄osu, b̄u Nnajiuphu mu ono, mu mawaru majia ̄enya ono. ̄O b̄uru l'iswi ̄ehu iya b̄e mu gude wofuk̄ota ̄enya l'iphemiphe, mu nweru g'̄o b̄uru iphe, iyi yifuru. Nta-a b̄e ̄ephe b̄ukotawaa nt̄u ekpofu l'̄enya mu; k'̄ophu b̄u l'̄o b̄ueph̄o K̄éreshi b̄e b̄u urwu, mu e-rita nw̄ekinyi iya. ⁹ M̄e k'̄ophu mu e-goshikwan̄u l̄e mu l'iya t̄ugbaru b̄uru nan̄u. ̄Ophu mu emēdu g'a s̄uje l̄e mu b̄u onye pf̄uberekoto, b̄u ̄ophu shi l'eme iphe, ekemu pfuru; ̄o b̄uwaru ̄ophu shi l'ekweta k̄e K̄éreshi. ̄O b̄uru ono b̄u ap̄f̄ubekoto ̄ophu shi Chileke l'̄eka bya eshikwaph̄o l'̄eka k̄e K̄éreshi. ¹⁰ Ḡe mu amaru iya; maru ike ono o gude shi l'̄onwu teta dz̄uru ndz̄u ono; m̄e ḡe mu l̄e K̄éreshi ̄obu at̄uko gbar̄u mgba l'iphe-̄ehuka ono, o jeru ono; m̄e ḡe Chileke emee ḡe mu d̄u ḡe K̄éreshi l'anw̄uhu ono, ̄o nw̄uhuru; ¹¹ k'̄ophu b̄u l̄e g'̄o d̄uhabe mu eshi l'̄onwu teta n̄odu ndz̄u.

Agba ̄Oso gbafu iya l'ishi

¹² Iphe, mu epfu ta ab̄ukwa l'o ruwaru mu ̄eka erwurwu; ̄ophu ̄o b̄ukwa l̄e mu d̄ukotawaa ree; ̄ole iphe, mu an̄o duje adz̄obaa b̄u ḡe mu nata obunggo

oso, mu gbaru; eshinu Kéreshi Jizosu natawaru mu mee mu b̄uru nkiya. ¹³ Ụnwunna mu; mu ta asụkwaru lẹ mu natawaru obunggo oso ono; obenu l'iphe lanu, mu emejekp̄ep̄ho kp̄urumu b̄u lẹ mu atụkoje iphe, mu t̄owaru azu z̄ohashichaa kukebeep̄ho ehu agba agbapfu ophu n̄o mu l'uzo iphu. ¹⁴ Mu an̄duje adz̄o ḡe mu gbafu oso ono l'ishi; k'ophu mu a-nata obunggo, b̄u iya b̄u ndz̄u ojejoje ono, Chileke shi l'eka Kéreshi Jizosu kua mu ḡe mu bya anata l'imigwe ono.

¹⁵ Oo ya b̄u; g'iphe, b̄ukotakpoo anyibe ndu kawaru enya l'iphe k̄e Chileke b̄ukwarupho egube iphe ono, mu ar̄i ono b̄e ep̄he l'a-n̄duje ar̄i. O -b̄ukwanuru l'o nweru g'̄o d̄u; unu haru ar̄i iphe ozo b̄e Chileke e-goshikwa iya-a unu g'o doo unu enya. ¹⁶ Oo ya b̄u lẹ-a; eshinu anyi gbawaru oso ono gbarwua ya l'ishi; g'anyi mejeekwapho iphe ono anyi mehawaru ono.

¹⁷ Ụnwunna mu; unu t̄uko g'unu ha meje ḡe mu eme. Anyi egoshiwaa unu iphe, unu e-meje. Unu t̄uko nw̄utaep̄ho eka ndu ono, eme iphe ono, anyi egoshi unu ono. ¹⁸ Mu pfuhawaru unu iphe-a ugbo olemole; nta-a b̄e mu gudeakwaa enya-mini ekwa epfuphuru iya unu azu; s̄u l'o nweru ikpoto ndu umere ph̄e egoshi l'ep̄he b̄u ohogu oswebe Kéreshi. ¹⁹ Ndu ono e-mechaa laa l'iswi; k̄ele oo iphe, a-la ph̄e l'ep̄ho b̄u chi ph̄e. O b̄uru iphe, iphere iya gege ad̄uje ph̄e b̄e ep̄he egudeje aba l'abaa. O b̄uerupho l'iphe k̄e mgboko-a b̄e ep̄he woru uche ph̄e dobe. ²⁰ A bya abya l'anyibedua; ibe k'anyi b̄uru imigwe. O b̄uru l'eka ono b̄e Onye-Ndz̄ota anyi ono, anyi ele enya iya eleshi iya ike ono e-shi bya, b̄u iya b̄u Nnajjuphu anyi, b̄u Jizosu Kéreshi. ²¹ Oo ya b̄u onye l'agbanwe ogwehu anyi-a, ad̄udu iphe, o b̄u-a; mee ya l'o d̄u g'ogwehu nkiya, l'egbu nw̄iinwii. Ike, oo-gude mee

ya bu ike ono, o gude emekota iphemiphe g'ọ lwa iya ẹ
mkpula ono.

4

Iphe, gbaru ndu ke Kéreshi l'ememe

¹ Oo ya bu; unwunna mu, mu yeru obu; unu pfuru
pfushia ike l'eka Nnajiuphu. Oghoroko unu egbukwa mu
egbugbu. Oo unu bu ẹhu-utso mu; ọ bukwarupho unu
be bu obunggo, mu e-gude aba abaa. Mu yeru unu obu
shii.

² Mu arwo unwanyi labo ono, bu Yuwodiya yee Sintiki
su g'obu buru phe nanu l'eka Nnajiuphu. ³ Teme
gubedua kwapho, bu okpobe onya; mu l'ia tukoru
eye udu ozi lanu; mu arwokwa ngu pho su g'i yejeru
unwanyi ono eka g'ephe meje iphe ono, mu suru g'ephe
me ono; noo l'ephe sekpooru akanya ezikashi ozi-oma
ono; mekpoo Kelementi yee ndu ozowaro, bu ndu anyi
l'ephe jegbaru ozi ono; bu ndu epha phe dukota l'ekwo,
Chileke deshuru epha ndu a-no ndzu ojejoje.

⁴ G'ehu tsojeepho unu utso l'eka Nnajiuphu tekenteke.
Ge mu pfuphukwa iya azu ozo; g'ehu tsojeekwapho unu
utso.

⁵ Unu meje iphe l'orwuberu iya gude goshije ndiphe
l'unu bu ndu obu oma. Nnajiuphu noakwa ntse. ⁶ G'ọ
to dukwa iphe, unu e-jeje ayọ oshi iya. Iphe, unu e-
mejechia bu g'unu pfujeru nu Chileke gude kajeru iya
iphemiphe, mkpa iya duru unu; unu ekelejekwa iya pho
ekele. ⁷ Oo ya bu; g'ehu-guu ke Chileke, bu iya kwata
dakiri ge nemadzu e-gude uche iya maru; aburu iphe, e-
wota obu unu me uche unu kwachia l'ime Kéreshi Jizosu.

⁸ Eka mu l'a-suberu iya unu ishi unwunna mu bu;
g'iphe, l'e-shitajepho unu l'uche buru oriri k'iphe ono,
bukota okpobe-opfu ono; me iphe, bukpo iphe, gbaru

kẹ g'e yeru iya ùbvù; mẹ iphe, bụ iphe, p̄furu ọto; mẹ iphe, bụkpoo iphe, e te merwuduru emerwù; mẹ iphe, bụ iphe, d̄u ree l'ẹnya; mẹ iphe, ọnu t̄koro w̄koo nan̄u l'ọ d̄kota ree; mẹ iphe, d̄u ùbvù; m̄kpoo iphe, bụ iphe, aaja ajaja. ⁹ Unu meje iphemiphe ono, unu nw̄taru lẹ ndz̄u mu ono; m̄kpoo ọphu mu ziru unu ezizi; unu emekwapho iphemiphe, unu n̄maru mu l'ọnu; m̄ ọphu unu gude ẹnya unu h̄ma l'ẹhu mu. Ọo ya b̄u; Chileke ono, emeje g'unu buru guu ono eswiru unu eswiru.

P̄olu ekele ndu Filipayi ekele kẹ ree, ẹphe meru iya

¹⁰ S̄u-a; ẹhu ats̄o mu ỳtso l'ime Nnajiuphu; k̄le nta-a b̄e unu byawaru bya emeaharu mu ree ọzo. Iphe, mu epfu ta ab̄kwa l'unu ta an̄dujedu epfu opfu ẹhu mu; ọ chikwa ỳzo te eshidu ad̄jeru unu g'unu mee ya l'ẹka. ¹¹ Mu te epfukwa l'ọ nweru iphe, ụko iya d̄uru mu; lẹ mb̄dua nw̄taakwaru g'iphe, mu nweru g'ọ hahab̄e phujeru mu l'ẹnya; m'obetaru ọ n̄du anw̄uru mu inwuagha. ¹² Mu maru g'a b̄jeru onye ẹjo ẹka d̄uru; bya amaru g'a b̄jeru onye nweru iphe. L'iphe, b̄kpoo ẹka mu n̄ b̄e iphemiphe ono mewaru mu; ẹbe ọ d̄edu iphe, ab̄jekwaduru mu ẹnya-aphapha l'ẹhu nkemu; mb̄u lẹ mu rijiru ẹpho; ọzo lẹ mu n̄ ẹgu; ? mu nweru iphe; m̄ mu te enwe-o; mu an̄-kirishilekwaa. ¹³ Ọ t̄o d̄udu iphe, mu ta ad̄udu ike emek̄ta; noo l'ọo Kéreshi b̄e b̄u onye emeje ike ad̄u mu k'ememe iya.

¹⁴ S̄u-a; unu nweru obu ọma l'ẹka mu n̄; yetar̄u mu ẹka teke ono, mu shi eje iphe-ẹhuka ono. ¹⁵ T̄eme unub̄e ndu Filipayi l'onwunu maru lẹ teke mu watakp̄oru ezi ozi-ọma ono lẹ mb̄u; ḡe mu l̄futaru lẹ Masedoniya b̄e ọ t̄o d̄udu Ch̄iochi ọzo, mu l'ẹphe t̄gbaru nan̄u; gbahaep̄ho unub̄dua kp̄urumu: ọo unu b̄u ndu an̄je mu iphe bya ab̄uru unu b̄u ndu anataj̄e l'ẹka mu. ¹⁶ Mb̄u

je akpachakpoo lẹ teke mu nọ lẹ Tesalonayika; unu shi emejeru mu mkpa; mẹ mkpa byaru mu; mbu ẹbe o bukwa ugbo lanu kpau be unu meru mu iya. ¹⁷ O to bukwa iphe ono, unu anuje mu ono be mu ele enya iya; o chia iphe, mu ele enya iya bu g'urwu gbaaru unu berebere. ¹⁸ Mu natakotawaru iphemiphe ono, unu nuru Epafurodayitosu g'o wotaru mu ono. Oo-sukpokwaaru iphe, mu eme iya tsufu etsufu. Iphe ono be unu vuru nu iya k'anyinyi. Iphe ono, unu nuru mu ono du ge ngweja, eshi kwekweekwee; ngweja, mkpo iya akpu tuuu alapfu Chileke. Mkpọ iya ono atso Chileke utso; k'ophu o goberu eka labo nata iya. ¹⁹ Le Chileke mu anukotakwaa unu iphe, bukpo iphe, mkpa iya duru unu. O buru l'iphe o nweru, odu-biribiri iya dakiri atu onu iya ono, shi l'eka Kereshi Jizosu ono be o-shi mee ya. ²⁰ G'o buru Chileke ono, bu iya bu Nna anyi be ajaja l'a-buru nkiya jasu le tuutuutu le mimiimii. Nokwa g'o du.

Ekele mkpochi-ishi

²¹ Unu keleru mu iphe, bu ndu-nsọ l'ehu l'ehu; mbu ndu ono, nọ l'eka Kereshi Jizosu ono. Unwunna anyi ndu mu l'ephe nọ l'eka-a l'ekelekwapho unu. ²² Iphe, bukpo ndu-nsọ, nokota l'eka-a g'ephe ha l'ekelekota unu-o; kekele ke ndu bu l'ibe eze nnajioha, bu Siza. ²³ Ge Nnajiuphu, bu Jizosu Kereshi meeru unu eze-iphe-oma-o. Nokwa g'o du.

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d